

摘藻堂四庫全書薈要

集部

欽定四庫全書薈要卷一萬八千七百四十五

集部

御定佩文齋詠物詩選卷一百二十三

別業類

五言古

題崔山人別業

唐儲光羲

南陽隱居者築室丹谿源谿冷怯秋晏室寒欣景暎山
雞鳴菌閣水霧入衡門東嶺或舒嘯北窓時討論封君
渭川竹逸士漢陰園何必崆峒上獨爲堯所尊

晦日遊大理韋卿城南別業

唐王維

與世澹無事自然江海人側聞塵外遊
解驂輒朱輪平野照暄景上天垂春雲
張組竟北阜泛舟過東鄰故鄉信高會
牢醴及佳辰幸同擊壤樂心荷堯爲君

尋鞏縣南李處士別業

唐岑參

先生近南郭茅屋臨東川桑葉隱邨戶
蘆花映釣船有時著書暇盡日窓中眠
且喜閭井近灌田同一泉

過汪氏別業

唐李白

遊山誰可遊子明與浮丘壘嶺礙河漢連峰橫斗牛汪
生面北阜池館清且幽我來感意氣搥魚列珍羞掃石
待歸月開池漲寒流酒酣益爽氣爲樂不知秋

潯陽陶氏別業

唐劉昫虛

陶家習先隱種柳長江邊朝夕潯陽郭白衣來幾年霽
雲明孤嶺秋水澄寒天物象自清曠野情何綿聯蕭蕭
丘中賞明宰非徒然願守黍稷稅歸耕東山田

初至洞庭懷灞陵別業

唐劉長卿

長安邈千里日夕懷雙闕已是洞庭人猶看灞陵月誰
堪去鄉思親戚想天末昨夜夢中歸煙波覺來闊江皋
見芳草孤客心欲絕豈訝青春來但傷經時別長天不
可望鳥與浮雲沒

五言律

終南別業

唐王維

中歲頗好道晚家南山陲興來每獨往勝事空自知行
到水窮處坐看雲起時偶然值林叟談笑忘還期

酬虞部蘇員外過藍田別業不見留之作

王維

貧居依谷口喬木帶荒邨石路枉迴駕山家誰候門
漁舟膠凍浦獵火燒寒原惟有白雲外疎鐘聞夜猿

從岐王過楊氏別業應教
王維

楊子談經處淮王載酒過興闌啼鳥換坐久落花多
逕轉迴銀燭林開散玉珂嚴城時未啟前路擁笙歌

宿岐州北郭嚴給事別業
唐岑參

郭外山色暝主人林館秋疎鐘入卧内片月到牀頭遙
夜惜已半清言殊未休君雖在青瑣心不忘滄洲

蘇氏別業

唐祖詠

別業居幽處到來生隱心南山當戶牖澧水映園林竹
覆經冬雪庭昏未夕陰寥寥人境外閒坐聽春禽

南谿別業

唐蔣冽

結宇依青嶂開軒對綠疇樹交花兩色谿合水重流竹
徑春來掃蘭樽夜不收逍遙自得意鼓腹醉中遊

潘司馬別業

唐周瑀

門對青山近汀牽綠草長寒深包晚橘風緊落垂楊湖
畔聞漁唱天邊數鴈行蕭然有高士清思滿書堂

和人秋歸終南山別業

唐錢起

舊居三顧後晚節重幽尋野徑到門盡山窓連竹陰昔
年鶯出谷今日鳳歸林物外凌雲操誰能繼此心

題樊川杜相公別業

錢起

數畝園林好人知賢相家結茅書閣儉帶水槿籬斜古

樹生春蘚新荷卷落花聖恩加玉鉉安得卧煙霞

題鄭侍御藍田別業

唐張喬

秋山清若水吟客靜於僧小徑通商嶺高窓見杜陵雲霞朝入鏡猿鳥夜窺燈願作前峰侶終來寄上層

遊崔監丞城南別業

唐劉得仁

門與青山近青山復幾重雪融皇子岸春潤翠微峰地有經冬艸林無未老松竹寒谿隔寺晴日直聞鐘

東谿別業寄段郎中

唐方干

前山含遠翠羅列在窓中盡日人不到一樽誰與同涼
隨蓮葉雨暑避柳條風豈分長岑寂明時有至公

冬日尋徐氏別業

唐僧皎然

近依城北住幽徑少人知積雪行深巷寒山遶故籬竹
花春自發橙實晚仍垂還共巖前鶴今朝下夕池

夏晚別墅

宋蔡襄

夏竹侍前楹涼襟析舊醅疊雲封日茜斜雨著虹明魚
動池開暈蟬移樹減清葭洲煙向暝鳬鷺自相迎

上湖閒泛艤舟石函因過下湖小墅

宋 林逋

平臯望不極雲樹遠依依及向扁舟泊還尋下瀨歸青
山連石埭春水入柴扉多謝提壺鳥留人到落暉

訪雲卿淮上別墅

宋 僧惠崇

地近得頻到相攜向野亭河分岡勢斷春入燒痕青望
久人收釣吟餘鶴振翎不愁歸路晚明月上前汀

飲張氏別墅

元 揭傒斯

楚國多才俊張家好弟兄出門湖水碧留客野堂清微
雨鳴疎竹塞煙覆古城園人隔畦語歲暮此中行

清漳黃氏北墅

元陳旅

聞說黃家墅開門入翠嵐細岑依舍北流水出城南雨
暖蘭抽筍霜晴樹落柑千年讀書地更莫乞羊曇

別墅晚晴與鄰叟久立

明劉仔肩

郊原初雨歇散步出荆扉落日在高樹涼風生客衣佛
香僧舍近江影塞鴻飛亦有南鄰叟忘言相與歸

五言排律

冬至後過吳張二子檀谿別業

唐
孟浩然

卜築因自然檀谿不更穿
園廬二友接水竹數家連
直取南山對非關選地偏
卜鄰依孟母共井讓王宣
曾是歌三樂仍聞詠五篇
草堂時偃曝蘭柁日周旋
外事情都遠中流性所便
閒垂太公釣興發子猷船
余亦幽栖者經過竊慕焉
梅花殘臘日柳色半春天
鳥泊隨陽鴈

魚藏縮項鰯停杯問山簡何似習池邊

七言律

春日題杜叟山下別業

唐 盧綸

百鳥羣飛山半晴渚田相接有泉聲園中曉露青叢合
橋上春風綠野明雲影斷來峰影出林花落盡草花生
今朝醉舞同君樂始信幽人不愛榮

春宴王補闕城東別業

唐 郎士元

柳陌乍隨洲勢轉花源忽傍竹陰開能將瀑水清人境

直取流鶯送酒杯山下古松當綺席檐前片雨滴春苔
地主同聲復同舍留歡不畏夕陽催

酬王季友題半日邨別業兼呈李明府

郎士元

邨映寒原日已斜煙生密竹早歸鴉長谿南路當羣岫
半景東鄰照數家門通小徑連芳草馬飲春泉踏淺沙
欲待主人林上月還思潘令縣中花

秋晚自洞庭湖別業寄穆秀才

唐
皮日休

江邨寥落過重陽，獨自櫻寧葺草房。
風捲紅蕉仍換葉，雨淋黃菊不成香。
野猿偷栗重窺戶，落鴈疑人更繞塘。
他日若修耆舊傳，爲予添取此書堂。

張舍人南谿別業

唐
僧法振

新田遶屋半春耕，藜杖閒門引客行。
山翠自成微雨色，谿花不隱亂泉聲。
漁家遣到堪留興，公府懸知欲厭名。
入夜更宜明月滿，雙童喚出解吹笙。

題少保張公曲阿別墅

金王寂

鐘湖亭下水淙淙綠野平
泉未易雙十里藕花紅步障
一軒松蔭碧油幢洛中獨樂有司馬
天下不知名曲江紙尾欲煩賢宅相
雨蓑添我坐篷窓

自山中歸鑑湖別業

元

吳景奎

數椽茅舍清江曲六月炎天困鬱蒸
賴有青山圍故宅歸來赤脚踏層冰
石泉松籟爲琴筑野藪山肴薦豆登
明日回頭望丘壑芙蓉半出白雲層

次韻奉題吳彥貞華林別業

明 吳 會

郡城南去有華亭花木成林竹繞汀
照影鳳凰臨月鏡
傳聲鸚鵡隔雲屏
分栽柳入陶潛傳
點校茶歸陸羽經
我亦延州老孫子
對江相望樂清寧

七言排律

許員外新陽別墅

唐 方 干

蘭汀橘島映亭臺
不是經心即手栽
滿閣白雲隨雨去
一池寒月逐潮來
小松出屋和巢長
新逕通邨避筍開

柳絮風前敲枕卧荷花香裏釣魚迴園中認葉分靈草
檐下攀枝落野梅莫恣高情求逸思須防急詔用長材
若因螢火終殘卷便把漁歌送幾盃多謝郢中賢太守
當時談笑許追陪

五言絕句

題袁氏別業

唐
賀知章

主人不相識偶坐爲林泉莫謾愁沽酒囊中自有錢

七言絕句

戲題輞川別業

唐王維

柳條拂地不須折
松樹披雲從更長
藤花欲暗藏
猓子柏葉初齊養麝香

題柳谿別墅

金姚孝錫

雨霽風和不動塵
柳邊携酒賞晴春
頻來谿鳥渾相識
渡水穿花不避人


楓塘別業

元尹廷高

白雲缺處露檐牙
雞犬相聞僅數家
幽鳥不啼林寂寂

滿山黃霧落松花

御定佩文齋詠物詩選卷一百二十三



總校官庶吉士臣侍

朝

校對官檢討臣蕭九成
謄錄監生臣朱文佐

欽定四庫全書薈要

集部

御定詠物詩選卷二百二十

四至
七

欽定四庫全書薈要卷一萬八千七百四十六

集部

御定佩文齋詠物詩選卷一百二十四

城郭類

五言古

晚登三山還望京邑

齊謝朓

灞涘望長安河陽視京縣白日麗飛甍參差皆可見餘
霞散成綺澄江靜如練喧鳥覆春洲雜英滿芳甸去矣
方滯淫懷哉罷歡宴佳期悵何許淚下如流霰有情知



望鄉誰能鬢不變

登城北望

梁簡文帝

登樓傳昔賦出薊表前聞灞陵忽回首河堤徒望軍茲
焉聊迴眺極目杳難分一水斜開岸雙城遙共雲

登石頭城

梁何遜

關城乃形勢地險差非一馬嶺逐紆回犬牙傍隆宰百
雉極襟帶億庾兼量出至理歸無爲善守竟何恤眺聽
窮耳目遠近備幽悉擾擾見行人暉暉視落日連檣入

迴浦飛蓋交長術
天暮遠山青
潮去遙沙出
薄宦慙師表
屬辭慚愈疾
願乘轂轅牛
還隱蒙龍室

秋日登廣州城南樓

陳江總

秋城韻晚笛
危榭引清風
遠氣疑埋劍
驚禽似避弓
海樹一邊出
山雲四面通
野火初煙細
新月半輪空
塞外離羣客
顏鬢早如蓬
徒懷建業水
復想洛陽宮
不及孤飛鴈
獨在上林中

遊龍首城

陳張正見

關外山川闊城隅塵霧浮白雲凝絕嶺滄波間斷洲四面觀長薄千里眺平丘河津無桂樹樽酒自淹留

新霽登周王城

宋梅堯臣

行行古城頭歷覽古城下水鳥傍人煙河流隔桑柘秋山豁晴翠野老親時稼民訟今已稀閒登厭官舍

七言古

附長短句

城南

宋孔平仲

密州三月猶有寒地平更在大海上昨朝雨止氣已晴

今日繁陰北風壯城南感水傍城流幾處垂楊繫小舟
傳聞寂寂無車馬紅杏夭桃各自稠

鄧州城樓

宋 陳與義

鄧州城樓高百尺楚岫秦雲不相隔傍城積水晚更明
照見綸巾倚樓客李白上天不可呼陰晴變化還須臾
獨撫危闌詠奇句滿樓風月不枝梧

高郵城

元 揭傒斯

高郵城城何長城上種麥城下種桑昔日鐵不如今爲

耕種場但願千萬年盡四海外爲封疆桑陰陰麥茫茫
終古不用城與隍

五言律

登襄陽城

唐
杜審言

旅客三秋至層城四望開楚山橫地出漢水接天回冠
蓋非新里章華即舊臺習池風景異歸路滿塵埃

登潤州城

唐
丘爲

天末江城晚登臨客望迷春潮平島嶼殘雨隔虹霓鳥

與孤帆遠煙和獨樹低鄉山何處是目斷廣陵西

江城晚眺

唐張祜

重檻構雲端江城四鬱盤河流出郭靜山色對樓寒浪
草侵天白霜林映日丹悠然此江思樹杪幾檣竿

登杭州城

唐鄭谷

漠漠江天外登臨返照間潮來無別浦木落見他山沙
鳥晴飛遠漁人夜唱閒歲窮歸未得心逐片帆還

夏日晚霽與崔子登周襄故城

宋
梅堯臣

雨脚收不盡斜陽半古城獨攜幽客步閒閱老農耕寶
氣無人發陰蟲入夜鳴余非避喧者坐愛遠風清

再至都城

宋
晁冲之

崢嶸花萼西清曉望猶迷御路紅塵合宮槐碧瓦齊夾
城知輦過複道覺香低中使傳宣入千門避馬蹄

郭外

明
薛蕙

郭外平蕪迴谿邊小徑斜客行迷野竹鶯語隔林花多

景每難遇孤遊還自嗟佳期竟何許脈脈向春華

七言律

和樊使君登潤州城樓

唐
劉長卿

山城迢遞敞高樓露冕吹鐃居上頭春草連天隨北望
夕陽浮水共東流江田漠漠全吳地野樹蒼蒼故蔣州
王粲尚爲南郡客別來何處更銷憂

河陰新城

唐
雍陶

高城新築壓長川虎踞龍盤氣色全五里似雲根不動

一重如月暈長圓
河流暗與溝池合
山色遙將埤堥連
自有此來當汴口
武牢何用鎖風煙

高郵城曉望

元薩都拉

城上高樓城下湖
城頭畫角曉鳴鳴
望中燈火明還滅
天際星河澹欲無
隔水人家暗楊柳
帶霜鳬鴈起菰蒲
短衣匹馬非吾事
擬向煙波覓釣徒

郡城晚望覽臨武堂故基

元張翥

全晉山川氣象開
滿城煙樹擁樓臺
土風舊有堯時俗

人物今無楚國材
千嶂晚雲原上合
兩河秋色鴈邊來
昔賢勝賞空陳迹
落日登臨畫角哀

五言絕句

聖明朝

唐
張仲素

九陌祥煙合
千春瑞月明
宮花將御柳
先發鳳凰城

城上

唐
白居易

城上鼙鼓朝衙復晚衙
爲君慵不出落盡繞城花

七言絕句

同王員外隴城絕句

唐錢起

三軍版築脫金刀
黎庶翻慚將士勞
不憶新城連嶂起
惟驚畫角入雲高

安仁巷口望仙人城

唐顧況

樓臺采翠遠分明
聞說仙家在此城
欲上仙城無路上
水邊花裏有人聲

北郭

宋文同

繞樹垂蘿蔭曲堤
暖煙深處亂禽啼
何人來此共攜酒

可惜拒霜花一谿

泗州東城晚望

宋 秦觀

渺渺孤城白水環，舳舻人語夕霏間。
林梢一抹青如畫，應是淮流轉處山。

過浦城

元 薩都拉

人家雞犬隔煙嵐，城郭微茫見塔尖。
一片輕雲籠馬首，熟梅時節雨纖纖。

泊皖城三日懷白下故人

明 宋 珏

城依碎石岸依沙行遍城南乏酒家日暮客愁如白下
蘆花風起似楊花

御定佩文齋詠物詩選卷一百二十四

欽定四庫全書薈要卷一萬八千七百四十七

集部

御定佩文齋詠物詩選卷一百二十五

橋梁類

五言古

賦得橋

梁簡文帝

浮梁既衝險
通波信可陵
乘空寫渭石
跨岸擬河冰
斜闌隱濁霧
布影入清澗
方知歌綠水
無待榜蒼鷹

石橋

簡文帝

惠子臨濠上秦王見海神寫虹便欲飲圖星逼似真

夕望江橋示蕭諮議楊建康江主簿

梁何遜

夕鳥已西度殘霞亦半消風聲動密竹水影漾長橋旅
人多憂思寒江復寂寥爾情深鞏洛予念返漁樵何因
適歸願分路一揚鑣

石橋

梁庾肩吾

秦王金作柱漢帝玉爲闌仙人飛往易道士出歸難

渡岸橋

陳陰鏗

畫橋長且曲，傍險復憑流。
寫虹晴尚飲，圖星晝不收。
跨波連斷岸，接路上危樓。
欄高荷不及，池清影自浮。
何必橫南渡，方復似牽牛。

和庾司水修渭橋

北周王褒

東流仰天漢，南渡似牽牛。
長堤通甬道，飛梁跨造舟。
使者開金堰，太守擁河流。
廣陵候濤水，荊峽望陽侯。
波生從故舶，沙漲湧新洲。
天星識辯對，檢玉應沈鉤。
空悅浮

雲賦非復採蓮謳

忝在司水看治渭橋

北周

庾信

大夫叅下位司職渭之陽富平移鐵鎖甘泉運石梁跨
虹連絕岸浮龜續斷航春洲鸚鵡色流水桃花香星精
逢漢帝釣叟值周王平堤石岸直高堰柳陰長羨言杜
元凱河橋獨舉觴

題石橋

唐

韋應物

遠學臨海嶠橫此莓苔石郡齋三四峰如有靈仙跡方

愁暮雲滑始照寒池碧自與幽人期逍遙竟朝夕

苦竹橋

唐 柳宗元

危橋屬幽徑繚繞穿疎林迸籜分苦節輕筠抱虛心俯
瞰涓涓流仰聆蕭蕭吟差池下煙日嘲哂鳴山禽諒無
要津用棲息有餘音

棲賢院三峽橋

宋 朱子

兩岸蒼壁對直下成斗絕一水從中來湧湑知幾折石
梁據其會迎望遠明滅倏至走長蛟捷來翻素雪聲雄

萬霹靂勢倒千巒嶽足掉不自持魂驚詎堪說老仙有
妙句千古擅奇崛尚想化鶴來乘流弄明月

七言古

高橋行

明
曹學佺

東西有湖相競白只隔湖中一片石石橋湖水照人行
幽意盈盈動日夕坐來水滿月亦多月在兩湖誰作波
波香羨煞採蓮曲却見長江帆影過

五言律

賦橋

唐張文琮

造舟浮渭日鞭石表秦初星文遙瀉漢虹勢尚凌虛已
授文成履空題武騎書別有臨濠上棲偃獨觀魚

詠橋

唐李嶠

烏鵲填應滿黃公去不歸勢疑虹始見形似鴈初飛妙
應七星制高分半月輝秦皇空構石仙島遠難依

天津橋東旬宴得歌字韻

唐張九齡

清洛象天河東流形勝多朝來逢宴喜春盡却妍和泉

鮪歡時躍林鶯醉裏歌賜恩頻若此爲樂奈人何

登平望橋作

唐顏真卿

登橋試長望望極與天平際海蒹葭色終朝鳬鴈聲近
山全髣髴遠水忽微明更覽諸公作知高題柱名

離蕪湖至觀頭橋

宋梅堯臣

江口泊來久菰蒲長舊苗爭雛洲鵲鬪遺子浦魚跳宿
岸欣逢戍歸船競趁潮時時望鄉樹已恨白雲遙

過青城題索橋

宋范成大

織簾勻鋪面排繩强架空染人高曬帛獵戶遠張罾薄
薄難承雨翻翻不受風何時將蜀客東下看垂虹

河橋成

金李俊民

預積他山木重新兩岸隄龍依天上卧虹傍水心低不
假鞭秦石何勞立蜀犀落成應有日誰向柱先題

宿三閘

元貢奎

小市人家簇扁舟晚色清山危傾地勢閘險著溝聲岸
石篙存迹谿風樹引情明朝順流去萬里眼初明

寶帶橋

元僧善住

運得他山石還將石作梁
直從隄上去橫跨水中央
白鷺下秋色蒼龍浮夕陽
濤聲當夜起併入榜歌長

青橋

明楊慎

閣道盤雲棧郵亭枕水涯
猿猱臨客路雞犬隔仙家
風起青丘樹春迷玉洞花
旅懷今日豁停幃問袞斜

高梁橋

明袁宗道

覓寺休辭遠逢僧不厭多
一泓春水疾十里柳風和香

霧迷車騎花枝耀綺羅半生塵土胃滌浣賴清波

五言排律

和李相公留守題漕上新橋六韻

唐白居易

選石鋪新路安橋壓古堤似從銀漢下落傍玉川西影
定闌干倒標高華表齊煙開虹半見月冷鶴雙棲材映
夔龍小功嫌元凱低從容濟世後餘力及黔黎

七言律

陪李七司馬阜江上觀造竹橋即日成往來之
人免冬寒入水聊題短作簡李公

唐杜甫

伐竹爲橋結構同褰裳不涉往來通天寒白鶴歸華表
日落青龍見水中顧我老非題柱客知君才是濟川功
合歡却笑千年事驅石何時到海東

曉上天津橋閒望偶逢盧郎中張員外攜酒同

傾

唐白居易

上陽宮裏曉鐘後天津橋頭殘月前
空闊境疑非下界飄飄身似在寥天
星河隱映初生日樓閣蔥蘢半出煙
此處相逢傾一盞始知地上有神仙

天津橋

白居易

津橋東北斗亭西到此令人詩思迷
眉月晚生神女浦臉波春傍窈娘堤
柳絲嫋嫋風縈出草縷茸茸雨剪齊
報道前驅少呼喝恐驚黃鳥不成啼

之石橋

宋韓維

聞道西橋水樹間，不辭驅馬涉風煙。
疎籬老屋臨官道，瘦棘荒茅蔽石田。
欲下鳴鴉盤木末，遠來驚雉落山前。
瓢中幸有邛醪美，不怕春寒雨滿川。

過宜福橋

宋 楊萬里

水鄉澤國最輸農，無旱無乾只有豐。
碧豆密爭桑蔭底，綠荷雜出稻花中。
是田是沼渾難辨，何地何邨不一同。
若使明年無種子，却愁閒煞雨和風。

惠安橋

元 貢奎

涑陽山水壯南州千尺飛梁連去郵蛟鱷翻濤聲吼夜
虹霓分雨氣橫秋險疑雲棧通車馬高比銀河挾女牛
鉅萬功成書太史絕勝舟楫濟中流

過長橋書所見

元
曹伯啓

柳如青幟導姑蘇橋若垂虹飲太湖渺渺天光接波浪
淒淒秋色上菰蒲行囊只剩新詩稿身世端如古畫圖
獨倚危闌追往事鴈銜霜信下平蕪

次韻馬昂夫總管飲仙橋詩

元
僧大訢

鐵鎖高懸隔杳冥仙橋有路上瑤京夜涼暗覺潛蛟動
曉色微看素練平坤極尚遺神禹力山靈空識祖龍名
爛柯舊事憑誰問石柱題詩薜荔生

海子橋

明 曾 棨

鯨海遙通一水長滄波深處石爲梁平鋪碧甃連馳道
倒瀉銀河入苑牆晴綠乍添垂柳色春流時泛落花香
微茫迴隔蓬萊島不放飛塵入建章

五言絕句

板橋

唐錢起

靜宜樵隱度遠與車馬隔
有時行藥來喜遇歸山客

板橋

唐司空曙

橫遮野水石前帶荒邨
道來往見行人清風柳陰好

上洛橋

唐李益

金谷園中柳春來似舞腰
何堪好風景獨上洛陽橋

方橋

唐韓愈

非閣復非船可居兼可過
君欲問方橋方橋如是作

梯橋

韓愈

乍似上青冥初疑躡菌蛄自無飛仙骨欲渡何由敢

青橋夜宿

明楊慎

驛亭臨白水石榻滿蒼苔遠客渾無夢江聲枕上來

七言絕句

臯橋

唐皮日休

臯橋依舊綠楊中閭里猶生隱士風惟我到來居上館
不知何道勝梁鴻

奉和臯橋

唐陸龜蒙

橫絕春流架斷虹，憑欄猶想五噫風。
今來未必非梁孟，却是無人繼伯通。

乘公橋作

宋林逋

晚峰橫碧樹梢紅，數榜漁罾水影中。
憶得江南曾看著，巨然名畫在屏風。

過神助橋亭

宋楊萬里

下轎渾將野店看，只驚脚底水聲寒。
不知竹外長江近，

忽有高梳出寸竿

曉坐荷橋

楊萬里

碧玉山邊白鳥鳴
綠楊風裏翠荷聲
草花踏碎教人惜
爲勒芒屨款款行

橫橋阻水

元胡天游

浮江積雨水連天
楊柳依依一釣船
白髮篙師多意氣
向人先索渡江錢

泊垂虹橋口占

元顧瑛

三江之水太湖東
激浪輕舟疾若風
白鳥羣飛煙樹末
青山多在雪花中

其二

江風吹颿條數里
野花笑人應獨行
更須對雪開金觥
要聽鄰船搗玉箏

楓橋夜泊

明高啓

烏啼霜月夜寥寥
回首離城尚未遙
正是思家起頭夜
遠鐘孤棹宿楓橋

望丹陽郭經揚子橋

明 銍 炳

暖風晴日丹陽郭處處東風是舊遊記得杏花寒食候
紫簫紅袖宿江樓

長橋

明 蘇大年

綠陰高樹映清潭一舸夷猶酒半酣最愛西城城下路
長橋煙雨似江南

題吳江垂虹橋

明 林 鴻

雲帆秋晚過垂虹落日鯨波動遠風欲借仙家遼海鶴

月明吹笛水晶宮

華陰駐馬橋

明程本立

絕谷層闕路屈盤斜岡側嶂石巔岼今朝駐馬橋邊立
華嶽三峰正面看

斷橋分手

明史鑑

近水人家半掩扉兩山樓閣尚斜暉斷橋無數垂楊柳
總被遊人折漸稀

于役江鄉歸經板橋

明楊慎

千里長征不憚遙
解鞍明日問歸橈
真如謝朓宣城路
南浦新林過板橋

板橋

明
曹學佺

兩岸人家傍柳條
玄暉遺跡自蕭蕭
曾爲一夜青山客
未得無情過板橋

御定佩文齋詠物詩選卷一百二十五

欽定四庫全書薈要卷一萬八千七百四十八

集部

御定佩文齋詠物詩選卷一百二十六

隄岸類

五言古

登隄望水

梁元帝

驅馬河隄上非謂城隅遊懷山殊未已徒然勞九愁
旅泊依邨樹江槎擁戍樓高岸翻成浦曲港反通舟
棗野良知歎瓠河今可儔願假宣尼道泗水却橫流

登武昌岸望

陳陰鏗

遊人試歷覽舊跡已丘墟巴水縈非字楚山斷類書荒
城高何落古柳細條疎煙蕪遂若此當不爲能居

七言古

隄下

宋孔武仲

隄下人家喧笑語高揭青帘椎瓦鼓黃流滾滾經簷甍
一任征夫作船苦綠榆覆水平如盃前灣旋放水頭來
聲如怒虎著船底玉石磊砢相喧豕黃河雖斷隨渠急

舟楫舒遲行旋澀獨上平隄望遠天衣裘已畏西風入

汴隄行

宋 孔平仲

長隄杳杳如絲直隱以金椎密無迹當年何人種綠榆
千里分陰送行客波間交語船上下馬頭一別人南北
日輪西入鳥不飛從古舟車無斷時

太平隄行

明 皇甫汈

太平門外古崇隄嘉樹扶疎夾路垂負郭盡爲芳草地
沿河直遶白雲司當時王貢總仙才況是承恩北闕來

御史府中烏半宿尚書門下騎雙迴青山幾度朝陵節
玄水曾流被洛杯鳴珂再過平沙道問舍多爲後來少
已看奏賦甘泉宮每憶傳詩臨海嶠驚心歲序易經春
舉目湖山宛自新含香不覩遊蘭客息影徒逢愛樹人
由來聚散皆無定欲寄相思那可因

七言律

吳興新隄

唐
朱慶餘

春隄一望思無涯樹勢還同水勢斜深映菰蒲三十里

晴分城郭幾千家謀成既不勞人力境遠偏宜隔浪花
若與青山長作固汀洲肯恨柳絲遮

蘇隄春曉

明
聶大年

樹煙花霧遶隄沙樓閣朦朧一半遮三竺鐘聲催落月
六橋柳色帶棲鴉綠窗睡覺聞啼鳥綺閣粧成喚賣花
遙望酒旗何處是炊煙起處有人家

五言絕句

入朝洛隄步月

唐
上官儀

脈脈廣川流驅馬歷長洲鵲飛山月曙蟬噪野風秋

七言絕句

隄上行

唐
劉禹錫

春隄繚繞水徘徊酒舍旗亭次第開
日晚上樓招估客
峨舸大舩落颿來

魏王隄

唐
白居易

花寒嬾發鳥慵啼信馬閒行到日西
何處未春先有思
柳條無力魏王隄

隄上行

唐
劉禹錫

酒旗相望大隄頭
隄下連檣隄上樓
日暮行人爭渡急
槳聲伊軋滿中流

其二

江南江北望煙波
入夜行人相應歌
桃葉傳情竹枝怨
水流無限月明多

汴隄

宋
劉子翬

參差歌吹動離舟
宮女張帆信浪流
轉盡柳隄三百曲

夜橋燈火看揚州

御定佩文齋詠物詩選卷一百二十六

欽定四庫全書薈要卷一萬八千七百四十九

集部

御定佩文齋詠物詩選卷一百二十七

舟類

四言古

舟楫銘

漢

李尤

舟楫之利譬猶輿馬輦重歷遠以濟天下相風視波窮
究川野安審懼慎終無不可

舟贊

宋

王叔之

致遠任重各因所由陸則乘車水惟用舟弱楫輕棹利涉濟求緬彼漁父鼓枻清謳

五言古

詠輕利舟應臨汝侯教

梁王筠

君侯飾輕利搖蕩邁飛雲凌波漾鷁彩汎水渙蛟文電
流已光絕鳥逝復超羣倏忽方千里戀茲歧路分

別韋諒賦得江湖汎別舟

陳張正見

千里尋陽岸三翼木蘭船鷁汎青鳬後雞鳴白鷺前涵

花沒淺纜帶葉動深艎不言朝夕水獨自限神仙

賦得雪映夜舟

張正見

黃雲迷鳥路白雪下鳬舟分沙映水浦照鶴聚寒流
檣風吹影落纜錦雜花浮船梁若是桂翻如月照秋

懼歌行

隋蕭岑

桂酒既潺湲輕舟亦乘駕鼓枻何所吟吟我皇唐化容
與滄波中淹留明月夜

泊舟貽潘少府

唐儲光義

行子苦風潮維舟未能發宵分卷前幔卧視清秋月四
澤葭葦深中洲煙火絕蒼蒼水霧起落落疎星沒所遇
盡漁商與言多楚越其如念極浦又以思明哲常若干
里餘況之異鄉別

李兵曹辟畫山水各賦得桂水帆

唐
李
頎

片帆浮桂水落日天涯時飛鴈看共度閒雲相與遲長
波無曉夜泛泛欲何之

三韻

唐
杜甫

蕩蕩萬斛船影若搖白虹起檣必椎牛挂席集衆功自
非風動天莫置大水中

誌峽船具詩

唐
王周

艣

制之居首尾俾之辨斜正首動尾聿隨斜取正為定有
如提吏筆有如執時柄有如秉師律有如宣命令守彼
方與直得其剛且勁既能濟險艱何畏涉遼負招招俾

作主汎汎實司命風烏媿斟酌畫鷁空輝暎古人存豐
規猗歟聊引證

艚

用之大曰艚冠乎小者楫通津既能濟巨浸即橫涉身
之使者頗弩之進者筴虎之擎者爪魚之撥者鬣此實
為相須相須航一葉

賦

箭飛峽中水鋸立峽中石峽與水為隘水與石相擊潰

為生險艱聲甚發霹靂三老航一葉百丈空千尺蒼黃
徒爾為倏忽何可測篙之小難制舳之獨有力猗嗟舳
之為彬彬堅且直有如用武人森森矗戈戟有如敢言
士落落吐胃臆拯危居坦夷濟險免兢惕彼哲匠心
俾其來者識

百丈

少嘗侍先人餘閒誦白氏始得入峽詩深味作詩旨云
有萬仞山云有千丈水自念坎壈時尤多兢慎理山東

峽如口水漱石如齒孤舟行其中薄水猶坦履屨顏屹
焉立洶湧勃然起百丈為前牽萬險即平砥破之以貧
簞績之以麻泉礪之堅以節引之直如矢杼軸連半空
長短隨兩溪鐵鎖枉馳名錦纜謾稱美長繩豈能繫朽
索何足擬苟非綸之為胡可力行此

吳江放船至楓橋灣

宋 薛季宣

短篷負長虹破籬挂明月風馬座中生天幕波間出高
城多隱映遠岫攬羅列少小泛吳江始識仙凡別

江船二詠

元
王 惲

蓬

尺簀編黃蘆節密數須隻長短隨所宜張弛易為摘一
傍繫脚索若網網總緝北人布為帆南俗蓬以荻舟師
貪重載高挂借風力順流與溯波巨鷁添羽翮望從遠
浦來一片雲影黑亂衝渚煙開重帶江雨濕百里不終
朝用舍從順適夕陽見晚泊堆疊紛褻積水雖物善利
其助乃爾益

魯舟

江船一巨魚，艖施乃尾鬣。當其淵水深，棹弱不救乏。故令施航後，前與棹力合。濟川具有五，此物乃其甲。一聲天際來，歟乃中流發。或浮大河東，竝岸行若狎。終朝卧舳間，蘭槳但空插。緬懷剡木皇，智創萬古法。

過桐廬漏港灘示舟人

元鮮于樞

驚流激長灘，百折怒未已。篙師與水爭，退尺進纔咫。技窮解衣下力排，過乃止。惟時春冬交，冰雪寒墮指。我時

卧舟中起視顙有泚迂踈一何補辛苦愧舟子

遠浦歸帆

元陳孚

日落牛羊歸渡頭動津鼓烟昏不見人
隱隱數聲艚水波忽驚搖大魚亂跳舞
北風一何勁帆飛過南浦

賦得山逐放舟遲送王主簿

明楊基

舟行山亦移山盡舟亦住青山無故人行
人自來去初辭逶迤谷復接參差樹杪轉
暮色分帆駛秋嵐度俄停風暫弱既遠煙
重護別意即山情依君屢回顧

七言古 附長短句

泛小輪

唐白居易

水一塘輪一隻
輪頭漾漾知風起
輪背蕭蕭聞雨滴
醉卧船中欲醒時
忽疑身是江南客

其二

船緩進水平流
一莖竹篙剔船尾
兩幅青幕覆船頭
亞竹亂藤多照岸
如從鳳口向湖州

大舟

宋王令

大舟無風船不舉小舟傍入青冥去舟中漁子呼且歌
夜半鬪魚誰得多

謝朱宰借船

宋陳造

書生祿邀空自憐三年官滿囊無錢身如絆驥心千里
安得一舸西風前令君磊落濟川手留滯亦憐窮獨叟
大舟百尺影白虹借我搬家我何有函牛之鼎著雞肋
涓滴渠須瓠五石劣留兩席寘圖書輦石囊沙壓揺兀
典衣買酒餉三老槌鼓鳴鑼人看好相過重讀借船帖

我自盧胡君絕倒

峽中得風挂帆

宋 楊萬里

樓船上水不寸步兩山慘慘愁將暮一聲霹靂天欲雨
隔江草樹忽起舞風從海南天外來怒吹峽山山倒開
百夫絕叫椎大鼓一夫飛上千尺桅布帆挂了却袖手
坐看水上鷺毛走

東西船

宋 方岳

昨日東船使風下窾過乘興快於馬今日西船使風上

適從何來急於浪東船下時西船怨西船上時東船羨
篙師勞苦自相覺明日那知風不轉推蓬一笑奚爾為
怨遲羨速無休時沙頭漠漠杏花雨依舊年時檣燕語

野水孤舟

宋
梁棟

前村雨過谿流亂行路瀰漫都間斷孤洲盡日少人來
小舟繫在垂楊岸主人空有濟川心坐見門前水日深
袖手歸來茅屋下任他鷗鳥自浮沈

牽舟行

元
貢奎

河水沄沄流不已
沂流牽船魚貫尾
怒風卷地漲黃塵
白日茫迷霧雲起
前船纜影百丈微
號呼併力行如飛
後船纜斷勢一失
汗身滿足不相及
須臾十里回天風
舉檣撒柁懸高蓬
誰知日暮泊處所
成功却與前船同
篙師接語告勞苦
僕從亦復譏途窮
持樽傲坐且引醉
悲喜豈足闕吾躬
君不見何獨人生
行與止請君萬事
推此理

遠浦歸帆

明

宣宗

斜陽欲挂晴川樹，丹霞遠映瀟湘浦。
洞庭湖上接星沙，萬里歸舟自何處。
雲帆縹緲天際來，勢壓滔天雪浪摧。
須臾已達漢江曲，江聲洶湧如鳴雷。
漢陽城頭夜吹角，暫從鸚鵡洲邊泊。
長笛一聲山月低，殘燈數點江雲薄。
西蜀滇南與海通，浮波來往自無窮。
暮天已捲三湘霧，曉日還懸七澤風。
突兀危樓瞰江水，臨眺何人頻徙倚。
寒鴉飛盡澹煙收，浩蕩遙空淨如洗。

雪蓬圖詩為蔡子堅作

明

蕭規

吳榜何年過東澗帶得山陰一篷雪春風浩浩吹不消
夜月娟娟照偏潔雪篷主人且好奇載客日遊隨所之
呼酒恒持金鑿落對花每品玉參差伊啞柔櫓渡湖曲
驚起鴛鴦不成宿汎汎斜當瓊樹移搖搖直傍銀槎矗
棹歌齊發聲抑揚高情獨愛水雲鄉從遊酬酢誰最密
儒雅人稱馬季常

謂馬公振也

水月舫為奚川錢竹深賦

明

湯穎勣

太乙真人蓮一瓣飄飄萬里來天漢移入江南錦繡窠

蘭橈桂槳空凌亂長鯨對舞碧紗窗缺兔潛窺紫綵幔
黍瓮浮香春可斟蒲帆颺彩風堪喚老興閒攄曲數謳
幽情緩發琴三歎古蹟多因潮洗平遠山忽被雲遮斷
曩時螃蟹落錢昆今日鱸魚到張翰莫令惠子識逍遙
且拉盧生遊汗漫水壺影裏塞鴻飛海鏡光中沙鳥散
好天良夜屬君多大壑深谿留我半乾坤正乏濟川才
忍教獨繫黃蘆岸

王有恒聽雨蓬

明

僧妙聲

江南雨多春漠漠蘆蔭中寬可淹泊坐聽蕭瑟復琮琤
若在洞庭張廣樂木蘭之楫青翰舟斜風細雨不須憂
筆牀茶竈便終日知我獨有滄浪鷗廿年攜書去鄉國
蕪城草深歸未得援琴時作廣陵散魚龍出聽天吳泣
江湖適意無前期身如行雲隨所之平山堂上看春色
還憶江南聽雨時

五言律

七夕泛舟

唐

盧照鄰

河段肅徂暑江樹起初涼水疑通織室舟似泛仙潢連
橈渡急響鳴棹下浮光日晚菱歌唱風烟滿夕陽

舟

唐
李嶠

征棹三江暮連檣萬里迴相鳥風際轉畫鷁浪前開羽
客乘霞至仙人弄月來何當同傳說特展巨川材

泛永嘉江日暮迴舟

唐
張子容

無雲天欲暮輕鷁大江清歸路煙中遠迴舟月上行傍
潭窺竹暗出嶼見沙明更值微風起乘流絲管聲

放船

唐 杜甫

送客蒼谿縣山寒雨不開直愁騎馬滑故作放船迴青
惜峰巒過黃知橘柚來江流大自在坐穩興悠哉

舟中

杜 甫

風餐江柳下雨卧驛樓邊結纜排魚網連檣並米船今
朝雲細薄昨夜月清圓飄泊南庭老祇應學水仙

賦得的的帆向浦

唐 司空曙

向浦參差去隨波遠近還初移芳草裏正在夕陽間隱

映迴孤驛微明出亂山向空看不盡歸思滿江關

秋夜船行

唐嚴維

扁舟時屬暝月上有餘輝
海燕秋還去漁人夜不歸
中流何寂寂孤棹也依依
一點前村火誰家未掩扉

泛舟

唐戴叔倫

風軟扁舟穩行依綠水隄
孤樽秋露滑短棹晚烟迷
夜靜月初上江空天更低
飄飄信流去誤過子猷谿

五瀉舟

唐皮日休

何事有青錢因人買釣船
闊容兼餌坐深許共蓑眠
短好隨朱鷺輕堪倚白蓮
自知無用處却寄五湖仙

放船

宋朱子

浩蕩清江水依微綠樹風
解維春雨外弭棹夕陽中
江草生新徑巖花點舊叢
詩翁不愁思逸興杳何窮

放船

宋楊萬里

岸岸人家住門門水面開
老翁扶杖立稚子看船來
一夜鳴春雨諸灘漲綠醅
順流行自快更著北風催

小舟

宋 趙師秀

小舟隨處去幽意日相親
野草如荷葉輕鷗似逸人
閒思此湖水曾洗幾京塵
甚欲營漁屋空虛未有因

歸舟

元 揭傒斯

汀洲春草徧風雨獨歸時
大舸中流下青山兩岸移
鴉啼木郎廟人賽水神祠
波浪爭掀舞艱難久自知

賦得天際舟送張孟功治河
元 傅若金

日下行人發春晨去鷁催
纜侵斜月解帆向斷雲開
度

鳥窺詩卷垂虹映酒杯尋源不可盡奉使幾時回

雨蓬

明高啓

楚雨滿汀洲瀟瀟灑灑客舟夢驚孤枕夜愁掩一蓬秋葦
葉寒相戰灘聲暗共流此時湘浦上同聽只沙鷗

賦得江帆送蔣氏歸儀真

明施漸

挂席發秋早微風已滿檣中流片影去遠水一舟將海
雨忽來重江雲相帶涼知投孝廉宅三徑接蒼茫

舟泊

明僧善學

江靜雨初收湖光滑似油岸如隨棹轉山欲赴波流牽
興多浮荇忘機足野鷗夜聞漁父笛吹破一天秋

五言排律

浮槎

唐駱賓王

昔負千尋質高臨九仞峰貞心凌晚桂勁節掩寒松忽
值風飈折坐為波浪衝摧殘空有恨擁腫遂無庸渤海
三千里泥沙幾萬重似舟飄不定如梗泛何從仙客終
難託良工豈易逢徒懷萬乘器誰為一先容

賦得天際識歸舟

唐薛能

斜日滿江樓天涯照背流
同人在何處遠月認孤舟
帆省當時席歌聞舊日謳
人浮津濟晚棹泛沅瀟
秋情潤欣全見歸遲怪久
遊離居意無限貪此望難休

賦得濟川用舟楫

唐胡權

渺渺水連天歸程想幾千
孤舟亂曲岸輕楫濟長川
迴指波濤雪迴瞻島嶼烟
心迷滄海上目斷白雲邊
泛濫雖無定維持且自專
還如聖明代理國用英賢

七言律

小舫

唐白居易

小舫一艘新造了，輕裝梁柱庫安蓬。
深坊靜岸遊應遍，淺水低橋去盡通。
黃柳影籠隨棹月，白蘋香起打頭風。
慢牽欲傍櫻桃泊，借問誰家花最紅。

夜船

唐韓偓

野雲低迷烟蒼蒼，平波輝目如凝霜。
月明船上簾幙捲，露重岸頭花木香。
邨遠夜深無火燭，江寒坐久換衣裳。

誠知不覺天將曙幾簇青山鴈一行

槎

唐吳融

浪痕龍跡老歌危流落何年別故枝歲月空教苔蘚積
芳菲長倩薜蘿知有文在朽人難識無壺藏心鳥莫窺
家近滄浪從泛去碧天消息不參差

舟行即事

唐杜荀鶴

年少髭鬚雪欲侵別家三日幾般心朝隨賈客憂風色
夜逐漁翁宿葦林秋水鷺飛紅蓼晚暮山猿叫白雲深

重陽酒熟茱萸紫却向江頭倚棹吟

帆

唐徐夔

豈勞孤棹送行舟輕過天涯勢未休
斷岸曉看殘月挂遠灣寒背夕陽秋
波平直可追飛箭風健還能汭急流
幸遇濟川恩不淺北溟東海更何愁

舟中曉賦

宋陸游

木落霜清水鳥呼扁舟夜泊古城隅
吹殘畫角鐘初動低盡寒空斗欲無
浪迹已同鷗境界遠遊方羨鴈程途

高檣健席從今始
歷徧三湘與五湖

閩門外登谿船

宋楊萬里

步下新船試水初
打頭攬載適逢余
一椽板屋纔經雨
兩面油窗好讀書
剩買春園紅芍藥
亂簪渠几竹籬籬
清谿浮取松亭子
賞徧千山不要驢

方寺丞艇子初成

宋劉克莊

船成莫厭野人過
久欲從公具釣蓑
積雨晴來湖面闊
殘花落盡樹陰多
新營小店皆依柳
舊有危亭尚隔荷

所恨前峰含暝色不然和月宿煙波

仙槎

元謝宗可

曾作河源萬斛舟塵根已斷卧蛟蚪無心下土承煙雨
有路層霄犯斗牛破浪遠衝銀漢曉凌風徑度碧天秋
歸來帶得支機石誰識人間博望侯

蓮葉舟

謝宗可

穩棹紅衣泛渺茫風帆浪擻水雲鄉曉撐太華半峰月
晚載西湖十里香藕放雪絲應作纜荷歌翠柄若為檣

不須更捧金仙足太乙真人夢正涼

題風雨歸舟圖

元
丁鶴年

昔向滄浪寄獨醒中流風雨正揚舲江空風捲潮頭白
野曠雲迷峴首青挂席正思遺珮浦推蓬已過濯纓亭
襄陽耆舊今安在撫几長歌對畫屏

題煙波泛舟圖

明
楊慎

舊遊憶鼓湘湖棹日淨風微江練平小艇曲穿花底出
游魚相伴鏡中行別來漫想心徒切畫裏重看眼亦明

素石蒼松是何處願從巢父濯冠纓

題王煮石推蓬圖

明 錢 宰

粲粲晴林截素霓夢回何處覓新題
畫檐壓檻江南屋短棹推蓬雪後谿
落月欲分花上下春風不隔柳高低
何當一見冰霜表放筆孤山煙水西

雪航

明 朱之蕃

江天凝望六花飛控帶峰巒玉作圍
獨棹扁舟凌浩渺更褰篷幔弄霏微
鷗鷺萬點衝蘆起翔鶴千羣挾浪歸

煮酒烹鮮漁唱發披裘醉卧失寒威

蹌風帆

明王鑑

江闊無憂風色橫蹌帆亦得達常程
畫屏峰下流觴過碧玉波中曲尺行
已有煙霞供秀豁更兼天日借晴明
眼中便是湘陰郭取得秋醪定九成

帆影

明錢希言

岸曲沙迴著處侵半江落日半江陰
悠悠亂逐春潮上漠漠還隨暮靄沈
曾帶斷鴉歸遠岫又移殘月出疎林

誰憐獨倚危樓徧目極天涯思不禁

五言絕句

葭川獨泛

唐
盧照鄰

倚棹春江上橫舟石岸前山暝行人斷迢迢獨泛仙

江南曲

唐
儲光義

綠江深見底高浪直翻空慣是湖邊住舟輕不畏風

其二

日暮長江裏相邀歸渡頭落花如有意來去逐船流

北澗泛舟

唐 孟浩然

北澗流恒滿，浮舟觸處通。
沿洄自有趣，何必五湖中。

江行

唐 錢起

霽雲疎有葉，雨浪細無花。
穩放扁舟去，江天自有涯。

其二

帆翅初張處，雲鵬怒翼同。
莫愁千里路，自有到來風。

其三

睡穩葉舟輕，風微浪不驚。
人居蘆葦岸，終夜動秋聲。

其四

艚慢生輕浪帆虛帶白雲客船雖狹小容得庾將軍

其五

風借帆方疾風迴棹却遲較量人世事不爽一毫釐

楊氏林亭探得古槎

唐皇甫冉

千年古貌多八月秋濤晚偶被主人留那知來近遠

江行

唐權德輿

孤舟漾暖景獨鶴下秋空安流正日晝淨綠天無風

昆明池泛舟

唐賈島

一枝青竹榜泛泛綠萍裏不見釣魚人漸入秋塘水

江行

唐陸龜蒙

酒旗菰葉外樓影浪花中碎帆張數幅惟待鯉魚風

艚聲

唐崔塗

煙外橈聲遠天涯幽夢回爭知江上客不是故鄉來

古意

唐闕名

長檣鐵鹿子布帆阿那起說儂安在間一去數千里

月夜泛舟

唐 僧法振

西塞長雲盡南湖片月斜
漾舟人不見卧入武陵花

羅噴曲

唐 劉采春

昨日北風寒牽船浦裏安
潮來打斷纜搖艚始知難

出都來陳和所乘船上句

宋 蘓軾

我行無疾徐輕楫信溶漾
船留村市鬧開發寒波漲

櫂歌

宋 白玉蟾

朝吸西風餐夜弄明月舞
萬頃碧琉璃下有玉清府

其二

黃昏杳無人孤江但翠竹惟有白鷺鷥伴我舟中宿

舟中

金王賓

河伯夸秋漲舟人健晚涼艚聲搖落月山氣鬱蒼蒼

題李漑之學士無倪舟

元虞集

三周華不注水影浸青天不上銀河去空明擊棹還

過高郵射陽湖雜詠

元薩都拉

雨濕鼓聲重風勻湖面平官船南北去帆影挂新晴

夕泛

元黃鎮成

秋淨山如拭江清一棹橫挂帆延暮眺趺坐待潮生

過吳城山

明汪廣洋

夜過吳城下不眠閒倚窗沂流雙艚健搖月下西江

鳧洲即事

明魯鐸

見說瓜堪摘閒過洲上來小船風打去半日未能回

古意

明王弼

莫作河中水願為水上舟舟行有返棹水去無回流

放船

明方太古

放船春水漫繫纜柳條青去去江邨近風吹魚網腥

舟夜

明徐良彥

席邊即水底蓬外是霜天偶得寒更句孤舟燭未燃

六言絕句

舟中

明鮑楠

野渡溶溶春水夕陽點點寒鴉歛乃數聲何處行人一

棹天涯

七言絕句

泛洞庭

唐尹恣

風光淅淅草中飄
日采熒熒水上搖
幸奉瀟湘雲壑意
山傍容與動仙橈

東魯門泛舟

唐李白

日落沙明天倒開
波搖石動水縈回
輕舟泛月尋谿轉
疑是山陰雪後來

夔州歌

唐杜甫

蜀麻吳鹽自古通萬斛之舟行若風
長年三老長歌裏白晝攤錢高浪中

五兩歌送張夏

唐顧況

竿頭五兩風裊裊水上雲帆逐飛鳥
送君初出揚州時靄靄瞳瞳江溢曉

杭州回舫

唐白居易

自別錢塘山水後不多飲酒嬾吟詩
欲將此意憑回棹與報西湖風月知

汴水舟行答張祜

唐杜牧

千萬長河共使船
聽君詩句倍淒然
春風野岸名花發
一道帆檣畫柳煙

舟次汴堤

唐朱景玄

曲岸蘭叢鴈飛起
野客維舟碧烟裏
竿頭五兩轉天風
白日楊花滿流水

江上晚泊

唐左偃

寒雲淡淡天無際
片帆落處沙鷗起
水濶風高日復斜

扁舟獨宿蘆花裏

江帆

唐羅鄴

別離不獨恨蹄輪渡口風帆發更頻
何處青樓方凭檻
半江斜日認歸人

解維

唐韋莊

又解征帆落照中
暮程還過秣陵東
二年辛苦煙波裏
贏得風姿似釣翁

淮中晚泊犢頭

宋蘇舜欽

春陰垂野草青青時有幽花一樹明
晚泊孤舟古祠下
滿川風雨看潮生

小舟

宋林逋

舷低冷夏荷千柄底舳斜穿月半輪
一笠一蓑人穩坐
晚風蕭颭弄青蘋

戲贈米元暉

宋黃庭堅

萬里風帆水著天麝煤鼠尾過年年
滄江靜夜虹貫月
定是米家書畫船

舟行絕句

宋張耒

渡頭煙雨欲昏天，灣畔枯桑繫客船。
風打篷窗秋浪急，一杯寒酒夜深眠。

水口行舟

宋朱子

昨夜扁舟雨一蓑，滿江風浪近如何。
今朝試卷孤篷看，依舊青山綠樹多。

題趙運管吟篷

宋徐照

飛塵難到碧波中，波上烟雲盡不同。
吟斷不知驚鷺起，

汀花一半在船蓬

宮詞

宋 花藥夫人

龍池九曲遠相通
楊柳絲牽兩岸風
長似江南好風景
畫船來去碧波中

襄陽絕句

金 王元粹

江雨初晴江漲發
涼風吹水波浪開
日暮津頭聞打鼓
越商已賈卸船來

北關買舟

元 尹廷高

北關門外柳青青閒寄江南第一程別酒未闌山鳥唱
短篷撐夢過臨平

鯨背吟

海洋舟航所見
詩尾聯以古句

元
宗
无

尋鯨

萬艦同踪在海心一時相離不知音夜來欲問平安信
明月蘆花何處尋

抛砭

千斤鐵砭繫船頭萬丈灘中得挽留想見夜深拋擲處

驚魚錯認月沉鉤

艚歌

浪靜船遲共一艚
艚歌齊起響連空
要將檀板輕輕和
又被風吹別調中

舟行

元傳若金

漁家日暮亂收罾
欲及前舟苦未能
行盡綠楊三十里
隔河遙見驛亭燈

櫂歌

傳若金

攀柳莫攀當路柳
繫船須繫上風船
當路人行無好樹
上風浪小得安眠

題李成所畫江干帆影

元黃公望

高閣崔巍瞰碧江
布帆歸去鳥雙雙
無邊樹色千峰秀
一片晴光落短窗

晚櫂

元周權

白水青林蕩曉晴
野禽樹底向人鳴
東風十幅蒲帆飽
快試淮南第一程

晚渡

周權

離離野樹綠生煙灼灼山花爛欲然
酤酒人歸春渡寂
柳根閒繫夕陽船

松林午憩

元李士瞻

松林坐久午風清
谿水潺潺樹有聲
何處小舟撐柳外
來迎潮落去潮生

春帆

元李存

能舉人間萬斛舟
中流何用櫓聲柔
楊花兩岸東風軟

送盡斜陽更未收

揚州客舍

元余闕

船頭澆酒祀神龍
手擲金錢撒水中
百尺樓船雙夾艚
唱歌齊上呂梁洪

欸乃歌詞

元郭翼

上塘船行無斷頭
下塘船少好安流
兩岸青山天上坐
看山吹笛上杭州

三衢道中

元張雨

大谿中道放船流
船壓山光瀉碧油
三百里灘歌枕過
買魚釀酒下嚴州

湖邨菴即事

元僧維則

竹根吠犬隔溪西
湖鴈聲高木葉飛
近聽始知雙舸響
一燈浮火夜船歸

訪仙洞山舟次大谿口

僧維則

窈窕仙家何處尋
夕陽明滅亂雲深
大谿橫斷青山合
一路風帆入樹林

與劉景王安固泛舟

明徐淮

雲平水暖魚吹浪
雨潤泥香燕啄花
著面東風濃似酒
扁舟流過白鷗沙

春日懷江上

明高啓

一川流水半邨花
舊屋南鄰是釣家
長記歸篷載春醉
雲籠殘照雨鳴沙

赴黃德讓招過南垞

明徐賁

風暗沙邨晚漸平
相邀應得遂閒情
南塘水滿人來少

疎雨寒波一舸行

蘭谿棹歌

明 汪廣洋

野鳬晴蹋浪梯平越上人家住近城
箬葉裹魚來換米
松舟一個似梭輕

舟過黃陵廟

明 詹 同


黃陵廟下倚船窗
水淺沙平屬玉雙
山外斷雲寒日晚
半窗殘雪下湘江

竹枝詞

明 楊 慎

江頭秋色換春風
江上楓林青又紅
下水上風來徃慣
一年長在馬船中

御定佩文齋詠物詩選卷一百二十七



總校官庶吉士臣侍 朝
 校對官檢討臣蕭九成
 謄錄監生臣朱文佐
 謄錄貢生臣江長鎰

財團法人
 佛陀教育基金會
 釋淨空
 敬贈

